

栗

香

二

筆

粟香二筆卷五

江陰 金武祥 澹生

朱子語類云甘節問昔以觀書爲致知之方今見得是養心之法曰一舉兩得這邊又存得心這邊理又到

觀書往往囹圄看過惟點句讀書爲最要古書奇奧有難於分句者看過數遍尋繹義理漸漸句讀可分後卽迎刃而解好學者流覽經史每日課程限看幾

卷具五色筆次第點過亦自然融貫記憶禮記云離經辨志離經卽點句讀書也

宋史儒林傳何基凡所讀書無不加標點義顯意明有不待論說而自見者

昔人謂借人書帙整理補綴歸之是大功德唐陸魯望甫里先生傳云借人書編簡斷壞者緝之文字繆誤者刊之

嘗見格言云學滿胸中則出言自有蘊藉理滿胸中

則行事自有涵養譬之富人未嘗有意炫赫而舉止自不寒儉

虞翻與弟書曰長子容當爲娶婦須遠求小姓使足生子天之福人不在貴族芝草無根醴泉無源又古語云娶媳須不如吾家者嫁女須勝於吾家者均可爲法

番禺陳蘭甫京卿見贈古詩及書字已載前卷其先世由金陵來粵故顏所居曰鍾山別業爲學海堂學

長數十年所著有東塾叢書四種及東塾讀書記壬午正月卒年七十有三余挽以聯云推南交第一儒林惟公抱道傳經共仰高風尊學海留東塾千秋著述從此談詩問字不堪別業過鍾山又何梅生直刺聯云大儒不再學者安宗從今山斗千秋莫共籍翺陪侍座異書滿家海內所誦獨惜權輿八志未追揚馬觀成篇時廣州本陸桴亭先生說設史志局京卿爲總纂也

七律詩善於言情寫景者推宋時陸放翁 本朝則  
查初白趙甌北爲最余七律詩喜效之爲蘭甫京卿  
摘入識月軒詩話者甚多然言情詩須一唱三歎入  
人心脾寫景詩須有比興方不淺薄余愧未能也

余丁卯秋試報罷返章門詩云歸來聊共賦閒居翻  
悔當時作計疎 穉穉秋風憐下第鬱葱佳氣喜充閭

時生兒已  
四閱月

漫論辛苦三條燭且報平安一紙書

寄湘  
省家

報  
游遍江山名勝處此行也算不曾虛馮子良先生

評云想見胸次之曠學養之純大稿有詩到和平是  
正聲之句卽以移贈何廉昉太守評云一氣灑落語  
語自然竊念秋風五度壯志都消流水光陰浮雲富  
貴又何得失之介介哉

趙甌北觀察句云潮定未分消長水風橫兼使往來  
帆徐鳳木布衣句云水淺擱舟沙怒語山巒轉柁月  
回眸皆善寫舟行之景余舊有句云槩因水淺每雙  
擱帆爲風橫時一斜廉昉以爲下句尤妙

余臨江道中雜詠云茅茨四五間何年在山麓溪流  
環其前四圍盡松竹濃綠漬不分野桃紅一簇淙淙  
田水聲依稀奏琴筑斜陽忽穿林歸雲時擁屋孤釣  
頽還支凌兢過黃犢新漲偶侵門鵝鴨爭向浴老漁  
得纖鱗換酒往來熟禽鳥亦忘機飛鳴安飲啄此中  
有佳趣蕭然遠塵俗自嘆世網纓頻年苦拘束停舟  
適相值鄉心頓振觸何日返江村幽居遂耕讀名利  
等浮漚一笑萬事足廉昉評云意境清絕入之陶韋



集中可以亂真

余家居及作客均好起早厲樊榭詩云幽人先鳥起  
林磴正寂然徐燮廷詩云旅宿先雞起秋寒共雁分  
讀之覺有勞逸之分

談肖巖下灘曲云飛濤奔白馬不費一篙手昨日曾  
上灘辛苦猶記否陳古村捉搦歌云瓜皮艇子長二  
丈小姑十撐九不上何如泊岸待潮長免打江心逆  
流槩余有贛州雜詩云飛湍急浪石縱橫牽挽連朝

滯客行此日上灘休悵望他時順水是歸程三詩皆  
悟處境待時之理

吾邑包文在孝廉彬遊宏濟寺詩云洞穴豁堂皇禪  
房半相借蓋名山岩洞多作佛龕或爲僧寮頗覺幽  
邃余游南城從姑山句云何年飛巨鰲到此成奇峯  
巉巖怒欲壓古寺嵌當中又游潮州湖山句云岩深  
古佛闢成屋樹密幽禽巢作家皆實有此景

贛南諸山險峻惟鳥道一線可通土人因避亂結屋

山椒望之連簷比棟如在天半謂之山寨甯都翠微  
峯其最著也余舊有句云橋惟支獨木屋每結懸厓  
又云趁墟歸向斜陽晚結寨居從絕壁遙至今思之  
猶恍在崆峒章貢間

隨園詩話云陝州鞏洛間人多鑿土而居沈孝廉琨  
有過陝一聯云人家半鑿山腰住車馬都從屋上過  
此蓋土山之低者耳

右軍蘭亭序今人多集字爲楹聯鮮有集字成詩者

余壬申里居逢上巳節戲集字成五古一章前半首  
云昔賢不可作稽古懷風流山林或寄興至樂咸猶  
猶快哉風日和娛此水竹幽觀時一以慨悲感亦有  
由後半首便覺敷湊故稿中刪之近胡衡齋大令見  
示其上已偕友人遊蒲澗寺集禊帖五律四首其一  
云盛會山亭集春和禊可脩有懷嗟古迹相遇盡清  
流臨水情殊暢當風趣亦幽因將今昔事感慨喻同  
遊其二云俯仰當時事於今又一年

上年曾遊蒲澗能仁寺遷

流隨大化作述得諸賢樂趣觴和詠幽懷管與弦斯  
遊知不倦人在暮春天其三云敘言殊契合靜坐感  
初終懷抱有時盡興觀與世同林泉娛永日蘭竹引  
和風況是清虛地欣然晤惠崇其四云無事悲今古  
虛懷契老彭形骸猶暫託游騁亦娛情浪迹一時合  
春陰萬感生靜觀能自得山水向人清揮灑自如能  
不爲集字所縛衡齋長汀人庚申進士前權南海番

禹現補海陽縣

衡齋弟德齋名欽由癸酉舉人作令西江兼工駢體  
詩詞爲余作試帖駢序其見贈詩已遺失近由衡齋  
處覓有春柳用漁洋秋柳韻錄其二首云一聲羌笛  
黯詩魂不爲春風怨玉門名士半邀青眼盼美人爭  
染翠眉痕泥融沙暖隄邊路霧淡烟濃雨外村寄語  
淵明歸未得折腰羞向故交論千絲萬縷未經霜春  
水平添漫野塘細雨橫停青箬笠征塵愁檢碧筠箱  
攀條在手思遊子飛絮無心證法王試舞婆娑姿態

好莫翻新樣學宮坊

凡遇 國制禮節用樂設而不作宋王黼傳遭欽聖之喪猶召樂妓舞而不歌號曰啞樂

隨園云人但知滿口公卿之人爲俗不知滿口不趨公卿之人爲尤俗又云士大夫熱中貪仕原無足諱而往往滿口說歸竟成習氣可厭

蔡狀元啟傳公車時投刺山陽令蓋同年而先仕者批其刺令闈者查明蔡拂然去及第後令專函具幣

謝過蔡邕之答以詩曰一肩行李上長安此日應憐  
范叔寒寄語山陽賢令尹查明好向榜頭看彭相國  
啟豐未遇時曾爲人書田券作中後彭告歸其田適  
涉訟事縣令照例傳中保質訊初不知卽相國也其  
差票適爲彭所見題詩其上曰三十年前彭啟豐無  
端高興做原中自從御筆親題後又見琴堂一點紅

二詩彭較蘊藉

停雲閣詩話錄宜黃陳少香借燦筆記云少年客吳



門與盧小鼻趙花兩周蓉澈李鐵航飲於黃均伯王  
少摩處几置牙籤數十分貯兩筒而宣令曰此籤依  
座分掣如丙掣乙筒卽乙掣丙筒掣得者照所註何  
事各賦七言一句須對偶和諧然後以籤示人考驗  
貼切與否不工者罰小杯一令三宣而不成者罰巨  
觥一少摩先掣得卽口占云千鈞氣力平風浪花雨  
應聲曰一線生涯走道塗予索視之王籤乃將軍柱  
趙籤乃縫窮人也小鼻掣後卽云鈴聲急雨三更驛

蓉澈對曰擔影斜陽十畝田小鳧所掣乃報馬蓉澈  
乃糞桶二字也鐵航掣閨閣瑣事花雨掣冠服出句  
云雲開曉鏡攏蟬翼對句云風閃峩冠動雀翎眾美  
其華而嫌二語不甚連屬予曰然則莫如集成語鄰  
姬鬪草時相遇侍女薰香侍早朝爲渾成也旣而少  
摩掣得偏袒均伯掣得囚車憤曰此物如何人令欲  
擲去少摩掣有出句云方外可知無正服予技癢卽  
對曰此中幾見有完人花雨叫絕而卒以犯令罰飲

俄而叩門入者黃玉芙康子蘭也于是興益豪對語  
佳者摘錄之告示對屁臭云鄉老昂頭看日月通人  
掩鼻歎文章眼鏡對婦人哺子云老將至矣憐子日  
少者懷之恃此胸又曰刮代金篦驚老至嘗貪玉液  
憶兒時戒方對行經布云子弟不才程白木女兒有  
喜驗紅巾不應省試對牛肉云秋戰看人雄拔幟春  
耕憶爾病扶犁朝珠對抹胸云明戴天顏珠一串暗  
藏春色玉雙峯修脚工對題名錄云足下工夫三寸

鐵眼前聲價一文錢官府坐堂對私孩云鼓吹可憐  
聲是肉歡娛誰料禍成胎枕頭對劊子刀云黃昏我  
便思依汝白晝公然敢殺人

堂伯祖南珍先生諱孝因遺詩爲李申耆太史採入  
江干香草中已載前卷江上詩草中亦錄三十餘首  
山中雜興云獨尋山中僧偶與幽意會淹留遂經旬  
日夕南屏對輕策登層椒欲窺全越概初陽澹微溫  
新松偃蒼蓋屐齒時鏗然疑踏犖确碎湖波搖空明

嫩綠上襟帶勝景得天成遙情寄塵外取適感斯須  
幸無白雲礙憇石常拄頰推牕時引頸雜遝忘日勞  
清曠要心領石枿紅始落蘿衣綠初引靡靡汀上蘋  
杳杳烟際艇霞光夕凌亂巖岫忽已暝滄洲不可期  
雲壑幸未吝故鄉睇綿邈初地卧幽冷夜涼敞西軒  
纖月生林影次韻松心表弟曉起云山氣化爲雨跳  
珠濺石溝風聲初撼曉人起爲驚秋碧樹已如夢青  
山相對愁不因高唱發何以破清幽雜興云公山山

下路寥落越王宮玉座凝塵寂金戈廢壘空寒流秋  
漱石疎籜夜吟風多少興亡恨淒涼今古同拂曉披  
衣起開園露未晞暗蟲依蘚石落葉點秋衣風景已  
如此飄零胡不歸無家更安往慚負菊花肥其他句  
如栖鳥暮無定行雲倦不還殘鐘三里寺禿樹幾家  
村岳王墓云不惜死纔能報國乞終喪祇爲思親暨  
陽秋興云廢苑清秋盤鶴鶴穹碑白石走蛟螭公詩  
族中無藏本爰摘錄以存之

元時江陰以詩名者陸子方許北郭繆晉石王梧溪  
爲最著梧溪集七卷爲邑明經葉保堂捐貲刻之鮑  
氏知不足齋叢書中流傳頗廣子方名文圭有牆東  
類稿散佚已久賴四庫全書采掇永樂大典而存  
之道光時李申耆太史於浙之文瀾閣錄取原本屬  
陸君清臣刊行之太史爲之序計六卷五百九十二  
首亂後僅於江上詩鈔中存一百二十首偶錄數首  
於此皆山樓云無詩山不喜無樓猶自可樓上著詩

人青山皆屬我得句山禽鳴落筆山花墮翠屏招我  
隱欲往輒不果推窗呼與飲醉吸雲一朵須臾成五  
采吐出驚滿座送周子華南歸云此日與君別相逢  
未有期衰年行欲盡近事或難知浩蕩風雲會蕭條  
草木悲三吳多俊傑試與問安危弔李古巖云堂堂  
山立萬人英一夕風霜玉樹傾公去隱然關世道容  
來何止哭交情安知死不如生樂但恨才難與命爭  
幸喜肯堂丹矚手隴西依舊振家聲



四庫提要云文圭學問淹通故稱心而談罔弗曲折  
鬯達元史儒學傳稱其文融會經傳縱橫變化莫測  
其涯涘殆不虛矣

又云許恕以元代遺民潛踪海上使人不能識可謂  
鴻冥其古詩意境沈鬱而音節高朗近體則多似陳  
與義大抵多愁苦之詞

許恕字如心家北郭故號北郭生詩十卷江上詩鈔  
存一百首余最愛其擣衣篇句云願將有限平生力

碎爾天涯鐵石心其近體詩如五言云風烟何慘淡  
門巷亦蕭條頻年多戰鬪漸老更流離江漢還多事  
乾坤未定居七言云關塞只今孤月在江湖能得幾  
人歸何處砧聲連野哭舊時月色照邊愁蕭條烟火  
三家市浩蕩風塵一布衣皆愁苦之詞也

四庫提要云逢少學詩於陳漢卿得虞集之再傳故  
才氣宏放而法度謹嚴集中載元明之際忠孝節義  
事甚備多作小序以誌其崖畧蓋其寓意所在也

翁覃溪石洲詩話云王梧溪夜何長三疊蓋寓亂極  
思治之意不減甯越扣角歌

又云王梧溪白翎雀引亦主石德閭而其詞該括有  
元一代興亡之事其旨則書無題後詩云莫讖白翎  
終曲語蛟龍雲雨發無時可以相證也

又云王原吉才力富健而抑揚頓挫不盡如元人概  
塗金粉至此而元人之境與宋人之境歸於一矣  
又云許北郭恕俊拔激昂處較王原吉才力差遜

前載江陰陳子重鼎著有滇黔紀遊並其配錢瑜素  
詞陳字定九號鐵肩道人又著有滇黔土司婚禮記  
一卷蓋贅於土司龍氏女名繼桓字又少此其就婚  
時所記也又少十七而歿遂續瑜素爲常熟錢伯可  
女養於龍氏與又少如同懷姊妹故龍歿遂爲繼室  
云滇黔紀遊附刻說鈴前集土司婚禮記附刻知不  
足齋二十一集

江陰沙張白字介臣 國初時諸生著有讀史大畧

六十卷窮四十年忘寢廢食之力而成語創理醕能  
補涑水考亭所未發樂府出入漢魏王阮亭貽書曰  
樂府絕響久矣僕行江南僅見足下余近在書肆購  
有讀史大畧及定峯樂府史畧則爲大興邵君綬名  
得之於先生族孫雲樓大令至咸豐七年刊行樂府  
十卷後附山左雜詠一卷則道光戊戌年重刊本

定峯燕市砧云擊碎天邊月閨中一片砧秋風如有  
意吹人旅人心射雁云西風落雁羣砮砮下平野就

中聲最哀應是孤飛者又云射雁不射單憫其無所  
依莫將雙雁射定有一孤飛閨怨云隴右銷兵已數  
年傳聞夫婿去朝天歸來賣馬牽黃犢我儘君耕有  
賜田廢宅云廢宅荒涼闕幾秋鄰翁猶話舊風流頻  
邀七貴開春宴更挾三姨續夜遊玉砌蘭摧巢蟋蟀  
金閨柳秃叫鴝鵒當年多少窮途客懷刺逡巡未敢  
投定峯詩選家鮮有採者爰錄數首於此

定峯長於史學詩亦咏古爲多嫫母云從來帝王系

莫媿黃帝昌得姓十有四姓姓爲帝王甲廢乙旋興  
絲絲亘無疆旁支入四裔建號君一方何人實啟之  
媢母發其祥令德母寰區景福庇久長誰云媢也醜  
坤儀冠姬姜乃知大聖人擇配惟其良吁嗟代云季  
冶容充闈房區區嘖與笑往往關興亡呂雉怨云楚  
兵急躡彭城駕孝惠魯元墮車下跳身獨走作帝王  
滕公亟收帝亟罵太公劉媪猶分羹何況區區兒女  
情儲位不移賴四皓長主幾嫁幕南庭帝薄吾兒與

吾女呂雉吞聲淚如雨異時稱制報帝恩幽殺諸劉  
王諸呂劉伶墓云羊車遊天子醉蝦蟆鳴嗣君醉錢  
神靈百官醉只有先生號獨醒螺贏螟蛉視晉魏荷  
鍤何心擇地理偶然一覺此間睡

唐詩云東風不與周郎便銅雀春深鎖二喬定峯詩  
云三江此夕無東風獻帝早作山陽公可以嗣響

定峯詩云十三經廿一史牙籤滿架貽孫子胸中書  
少架上多君其奈此子孫何君不見田間有子起白



屋偏向朱門借書讀可爲藏書家作一棒喝

荆駝逸史刻有江陰城守記二卷長洲韓慕廬宗伯  
撰成於康熙乙未自序稱少游戚氏殉節地搜羅散  
佚刪煩去複彙爲一編蓋以江上孤忠錄爲底本而  
增損之者也南都亡後大兵所至無不立下豫王並  
命降將分道安撫常州各屬獨江陰不應其時貝勒  
博洛及劉良佐實率師圍城惟所稱薛王七王十王  
號三王及十八將究未詳何名

明末江陰知縣林之驥福建莆田人初不解江南語以林木瓜呼之時鄭帥率流兵過境幾欲劫城驥與鄭帥同鄉出謁燕語遂肅然無犯崇禎十七年五月封留庫藏哭廟解印綬去署內復封留衣飾囊資共八百金慕廬氏稱其才識有足多者諒哉

當江陰議城守時徽商程璧首捐餉三萬五千兩陳典史拜而納之又薦邵康公爲將陳典史復命其往太湖福山乞師兼往田淮撫處璧盡出所儲十四萬

男存一三三  
卷三  
一十  
金充餉往乞不應又往徽州及至兵已潰比返城已  
陷遂爲僧于徐墅近時富貴而爲商者多矣有如是  
之仗義急難者乎

慕廬宗伯守城記後又附許重熙記一篇蓋約舉言  
之而斷以江陰野史論數語較韓記爲簡淨

方子可國簿名愷爲方彥聞先生長孫近客嶺南見  
示先生所著萬善花室集先生名履錢陽湖人著籍  
大興嘉慶二十三年舉人福建永定知縣調閩縣一

載暴卒有駢體文七卷曾受業楊蓉裳農部故爲文  
亦異曲同工又詩四卷詞一卷蓋舊雖刊行亂後僅  
存此本

萬善花室詩風格適上湘江道中二首云萬古難消  
意人生別恨多請看湘水上帝女怨如何竹響瑤琴  
夢山空寶瑟歌積愁本無限此地易滂沱況有文章  
客爭雄天地都寫騷開奧宅埋骨峙澄湖七澤吟何  
咽三湘勢易孤我來無可達猶見舊蘼蕪

元祐黨籍碑之在臨桂龍隱巖及融縣真仙巖者皆  
黨人子孫磨崖刻之以永其傳甌北詩鈔有桂林元  
祐黨籍碑搨本歌徵引繁富惟云相傳星變已毀碑  
此碑何以完無虧似未知卽黨籍中梁燾曾孫梁律  
磨崖重刻之本萬善花室詩有融縣黨籍碑歌有云  
從官沈公有賢裔述職朝奉居南陲自矜厥祖列忠  
黨選石重泐融水湄則明敘黨籍中沈千曾孫沈暉  
重刻之本較趙歌爲核實又云溫公蘇公最昭著日

星朗朗人皆知餘者歲遠或恐晦得此炳耀千秋期  
則與趙歌所云磨礪貞石妙鐫刻翻似爲作功德銘  
同一用意

詠古詩以考據精核爲上萬善花室詠馬伏波祠云  
功闢九真路博德戰歸七郡馬文淵伏波前後動同  
紀銅柱威靈祭獨虔壯魄哈哈成大蟒傷心跼跼仰  
飛鷲平生馬革酬恩易來謁荒祠願執鞭伏波將軍  
路博德亦有是稱妙在卽以作襯

萬善花室詞齊天樂簾影云碧紅三月飛雲幻依稀  
畫樓如障押蒜黏花裁絲款絮定有春魂相傍迷離  
半晌任雨雨風風織成愁樣一桁殘痕又隨香篆映  
低幌 西窗斜日乍轉正相思萬縷鸞袖搖漾隔著  
微波牽來碎月燕侶生生惆悵湘烟欲上正歸路分  
明玉鈎潛響暈得啼眉繡闌凝遠望

楊海琴觀察郊行雜詠云水滿陂塘浪不停天光雲  
影盪空冥柳梢蘸碧秧針綠襯得青山分外青雨餘

草色滿溪生烟際微聞蛙鼓鳴一帶短牆脩竹裏石  
橋西去有書聲似爲余村居圖寫照故愛誦之海琴  
名翰晚號息柯北平人由翰林出守湖南旋擢辰沅  
永靖道

海琴有袞遺草堂詩鈔十二卷秋日云落葉不知數  
蕭蕭滿石牀寒花補秋色疏竹漏斜陽人與琴心古  
詩隨茶味長間來林下坐雲氣冷衣裳同弓生岑劉  
少漁飲酒作云乾坤吾輩在相見便欣然豪氣騰天



外奇愁到酒邊風雲悲壯歲石火感流年所遇無長  
策高歌夕照前佳句如江山涵暮色風雨亂秋聲亂  
雲團野樹驟雨碎枯荷竹疏風灑落雲薄月玲瓏菊  
花云寒到九秋惟賸我澹無一語最宜詩紫薇花云  
黃昏庭院香如夢破碎胭脂寫不真古詩佳篇甚多  
僅錄其警句云崩崖欲墮江俯抱老樹救又云寒鐘  
沈遠水烟化一江碧狀景可謂奇峭

清泉符子琴別駕名翁曾客都門求書畫者戶屢恆

滿近見示其蔬筍廬詩草送章伯鶴入秦云迢遞長  
安道書生此壯游馬聲嘶落木劍氣躍清秋酒盡郵  
亭淚山連絕塞愁相期收虎穴談笑看封侯其他五  
言如歸舟云江添新漲綠山近故園青贈曾品石云  
江山雄畫筆兵火老詩才七言如過洞庭湖云北去  
波濤走巫峽南來烟雨接瀟湘步張春階侍御韻云  
橐筆半生愁浪跡買山何日遂幽居豪邁侷儻與書

畫相稱

吳霽亭名綸知醫善書丙子游粵落落不偶體弱多病常思歸余謂舊聯有天爲補貧偏與健人因見懶誤稱高之句可自書懸之上聯且以爲頌也近知余搜輯故舊詩文有書來云先祖號冰漁家貧棄舉業而習岐黃好吟詠有攄懷草亂後不存僅記訪梅一聯云野店籬疎雙鶴立山家門掩一琴鳴又業師徐雨峯先生亦好爲詩僅記其咏雁字云塞雲濃潑墨江雨淡勻箋今彙錄之惜其所記不多耳

漠漠水田飛白鷺陰陰夏木嘯黃鸝寫景詩須得如此高渾白鷺下田千片雪黃鸝上樹一枝花便覺雕刻兩箇黃鸝鳴翠柳一行白鷺上青天亦覺牽淺鷺啼楊柳金歌舞蝶宿梨花雪夢魂尤纖巧不可學

張季鷹云使我有身後名不如卽時一杯酒常見一聯云長歌達者杯中物大笑前人身後名卽用此語而整齊之又有聯云使我有身後名不如卽時杯酒丈夫擁書萬卷何假南面百城則又用成語屬對亦

覺渾成

歸潛志云金海陵庶人讀書有文才爲藩王時嘗書  
人扇云大柄若在手清風滿天下人知其大志 先  
曾祖筆記載宜興周挹齋相國幼年曾以把扇輕搖  
一統乾坤隨手轉對將書作枕千秋賢聖共頭眠蓋  
扇一面繪天文一面地理卽事屬對見其不凡

諸名士小集一人出令要古人單傳名句因舉滿城  
風雨近重陽於是有言池塘生春草有言楓落吳江

冷有言空梁落燕泥有言庭草無人隨意綠令官皆  
令飲酒眾問其故令官曰諸公所舉皆有全篇惟重  
陽七字則自催租敗興後曾未續成方是單傳句也  
眾乃服又枹鼓不鳴董少平漢書中似此者甚多千  
乘萬騎上北邙爲漢童謠青絲白馬壽陽來爲梁童  
謠皆單傳句

酒令又有詩句聚訟格云黃梅時節家家雨梅子黃  
時日日晴只是熟梅天氣半陰晴杜鵑枝上月三更

子規啼徹四更時只是子規夜半猶啼血故遣寒梅  
第一開無數梅花落野橋只是林寒疎蕊半開落

又有改字詩令將古詩讀錯一字另引一句詩以解

之如少小離家老二回

明是老大  
何云老二

只因老大嫁作商

人婦菜花依舊笑春風

明是桃花  
何云菜花

只因桃花淨盡菜

花開舊時王謝堂前花

明是燕  
何云花

只因紅燕自歸花自

開

山東省城有歷下亭何子貞太史集蘭亭字題聯云

山左有古厯亭坐覽一帶幽齊之盛大清當今萬歲  
是爲九年己未所脩集字巧合造句尤覺渾健

無錫惠山張睢陽廟聯云天地風塵古廟丹青今幾  
劫江淮俎豆空山鼠雀亦千秋傑句頗能驚人

同治間招商局承辦海運有福星輪船運糧赴津遇  
霧撞裂全船沈沒押運委員均殲於海天津地方

敕建愍忠祠祀之李傅相題聯云大海咽波濤遺恨  
難填精衛石聖朝多雨露褒忠常傍水仙祠蔡君炳



泰聯云一死亦何奇諸公浩劫同淪最難堪碧海驚  
濤寥天慘霧千秋均不朽異日英靈如在願常護帆  
檣風轉芻粟雲飛杜君文溥云沿于海以達河頻年  
轉漕重洋共歷艱難非一日勤其官而死水看身後  
褒忠鉅典常膺俎豆到千秋

胡文忠公挽羅壯節公遵殿殉節杭州聯云世治正  
人爲人世亂正人爲神一室貞魂光國牒大節忠臣  
不生大名忠臣不死千秋遺恨付胥濤

蘇秦云貧窮則父母不子富貴則親戚畏懼後人倒用其語云富貴則父母不子貧窮則親戚畏懼用意更深一層近賢有詩云功名易短英雄氣貧賤能疎骨肉恩亦有慨乎言之

屬官謁上司先至官廳卽古之客坐東坡有客坐假寐詩今客坐人多往往久候談笑間作以資消遣廣州理事同知長仙渠與署廣州通判多與三皆旂人多好詼諧以長身矮常呼爲長矮子而對大小兒以

爲謔長樸質而訥於言或曰曷不以多少爺呼之非  
天然巧對乎眾爲撫掌稱善

昔人臺灣詩有荷花度臘菊迎年之句貴策安太守  
權篆瓊州寄示竹枝詞十二首第一首云天涯海角  
春偏早十月山桃已放花蓋臺瓊二郡俱在極南故  
氣候如此

彭南屏太守以雙親年高假歸不出客冬來書述其  
令嗣登鄉薦並錄嚴芝僧太史辰賀聯云賢書真故

物最堪誇具慶重闈豈獨雙親未老元宰是家珍此  
後歷前程萬里先從一舉登科南屏承先啟後樂志  
家園尤足羨也

秦文伯太守由桂林調署梧州寄贈律詩並以途中  
感懷詩見示有云九屬風行苛政少一方星聚長官  
賢又云人慕好官曹武惠我欽善治漢文翁和平渾  
厚其言藹如至見惠詩則云才猷垂治譜儒雅是吾  
師又題余粵西游草云舟楫需材名世貴山川能賦

大夫賢兩省關河籌幹濟一編金石著文章則不免涉於阿好矣

昔人詩云行役是閒時余有句云轉以風塵俗而得山水緣去歲桂林之行公餘游覽得雜記及古今體詩成帙是其驗也

吳興姚玉裁徵君世鈺號蕙田有孱守齋遺稿沈歸愚尙書序之謂其備文質兼雅怨吳江道中晚泊云纜船青楓岸林寺帶暝色鐘聲飄暮雨響入湖烟濕

猶送遠江帆茫茫去安極將之揚州與家人病中別  
云暮齒千行淚新年百病身自然憔悴盡何待別離  
頻藥裏關心勸衣裝倩手紉平安早相報江上有春  
鱗自京口溯江抵金陵云揚舫直溯大江流萬里風  
烟指顧收極目西來岷嶺秀驚心東下海門秋幾回  
沽酒尋京口一路看山到石頭曾是先公持節地自  
傷卑賤此間游長江萬里圖云吳頭楚尾昔曾經咫  
尺今爲萬里行不盡大江東去路海天空闊有蓬瀛

其他句云清時自棄須知命痼疾初平且讀書飛騰  
暮景心先淡哀樂中年鬢已蒼可以見其處境

余每見同郡人詩文稿必購取之近於書肆見有金  
匱華次谷學燾賞雨茆屋遺藁六卷才華頗勝七絕  
風致尤佳過徐氏村莊云冷雲黯黯隔山家髡柳瘦  
藤遶徑斜流水斷橋人獨立自披風帽看梅花埭川  
舟中云魚汀鴛渚蕩菴繞自拓船窗鎮寂寥十里垂  
楊青不斷就中橫箇小紅橋餞春詞云金鶯聲老玉

蠶眠如水韶華劇可憐  
榆莢拋殘蓮葉小天公浪費  
買春錢暑窗雜詩云慣攜藥裏與茶鎗  
白袷兜涼曳履行瓜架豆棚人悄悄  
一星螢火照花明其他佳句五言如曉發云海日閃天光割碎雲藍紙晚泊云鴉歸棲暝烟魚躍破新凍游椿桂山云荒逕落黃葉出門秋已深秋日晚步云四山催暝色萬木變秋聲夕過望湖門云水月孤舟夢風霜獨夜心七言如春思云情絲恨縷同功繭零粉殘脂薄命花埭川晚歸云



估客船依春水渡寺僧鐘打夕陽山秋懷云傲骨不  
凋霜後菊凡材眞作道旁樗和鰲峯弟云琵琶夜月  
銷魂曲紈扇秋風感舊心夢亡內云傾情難訴三生  
恨永訣猶餘一面緣

無錫杜季英雋僑寓廣州咸豐丁巳海上事起季英  
臥聞礮聲啟戶出視猝與礮遭飛其首而仆年二十  
有五有小樊川詩藁二卷其友山陰汪芡生刊之如  
尤西堂之於湯卿謀風義之篤不讓古人錄其讀芡

生隨山館詩卷書後末首云綺麗非本性小兒炫金  
碧騷人李唐後輾轉傷剽襲構新諧寸心造古匯羣  
力茲理苟不乖猶當遇真識七夕詞云水精簾碧鮫  
綃寒銀雲櫺櫺明星灣曝衣樓高萬花夕西南迎出  
蛾眉月雲窗霧閣不成影一葉梧桐落金井針樓穿  
斷女紅絲露濕雲鬟不知冷羊燈燄碧愁奈何燕脂  
倦態嘖雙蛾象牀一夜不成夢明朝乞巧知誰多秋  
望云危樓疎雨外遠望入新晴飛鳥如有意秋山空

復情千巖雲共夕諸澗水爭鳴愁聽叢祠畔蕭蕭黃  
葉聲夜坐云夜深苔坐晚風微引得蟲聲上客衣秋  
露乍涼人不寐一星螢火入簾飛春遊云岸曲鶯聲  
特地尋麴塵低罨畫廊深賣花門巷臨春水二月家  
家有綠陰春日云湖外波平鏡面光東風垂柳復垂  
楊嬉春舊事那堪憶才到紅樓又夕陽其他佳句柳  
花云若還飄蕩原如夢似此纏綿尙戀春人來客路  
剛三月春在天涯又一年無題云畫榭有香皆撲蝶

綠波無影不驚鴻聞笑生將還廣州云天未涼風懷  
李白人間歧路泣楊朱

近能刻亡友詩者又有陳子厚刻會稽陶卿田文鼎  
有真意齋詩鈔四卷偕友人郊遊四首之一云萬物  
含化機春光遍林莽不能爲君贈亦不禁君取譬如  
今日游誰復論賓主愛花君自折愛酒君自舉微風  
灑然來吹散林外雨間聞白鷗飛交交黃鳥語眼前  
有佳句顧盼入毫楮君看野棠花娟娟如靜女醉飲

無幾何花開已如許詞意清妙在蘇州香山之間

卿田久於幕府故通達政事雜詩七首之一云治世  
貴大體法密徒拘牽英雄受束縛吏胥乃有權規條  
日以繁吏權日以專人才居下位舉動不自全救過  
且勿違政術何由宣方知單父治非獨宓子賢

又有替比卯詩序云比卯者州縣官以事命役而限  
其期逾期則杖而再限之名曰比卯役不勝杖以錢  
倩人代受曰替比卯某明府宰大邑死後其子不能

自立卽於其縣而替比焉余聞而悲之仿香山秦中  
吟之意賦此一篇爲牧民者芻蕘之獻詩云縣門昨  
夜呼比卯替杖有人圖一飽公庭一杖杖幾錢得錢  
之人方少年少年意氣無窮已借問少年胡若此旁  
人欲語先長吁是固當年貴公子先人百里結銀黃  
遠道移家入縣堂使君自詡真能吏愛子人誇小鳳  
凰公子何所居綺窗畫壁開精廬公子何所食何曾  
萬錢供一擲公子何所衣師蠻結帶生光輝公子何

所遊秦箏趙瑟居倡樓使君昔日刑人地此日人刑  
公子替可憐行杖白頭人猶是當年案前隸富貴功  
名有盡時茫茫天道豈無知寄言世上臨民者莫忘  
南山小雅詩

祥符周昉叔都轉詞壇老宿所至提倡風雅有王漁  
洋曾賓谷諸先生之風歛人潘伯時大令以詩進謁  
都轉致書云前日惠臨因小極未克倒屣逮捧誦柳  
堂詩錄并兩度秋闈唱和集名篇佳句美不勝收不

覺心形俱服弟早歲倖掇科第於問學未涉藩籬願  
不讀書而嗜書不知詩而好詩三十以前橐筆諸侯  
輒訪其地之知名士相與推衿送袂倚袂聯裳屈指  
生平以文學訂交者頗不乏人猥蒙諸君子引爲素  
心不加鄙棄客夏量移東邁與明公同官是邦而歲  
星一周未嘗一奉大教所謂邑有顏子而不知弟罪  
大矣弟初識江陰金漣生運同讀其詩歎爲異才竊  
謂嶺南縉紳之言詩者殆無其匹不意更得閣下合



二公之詩觀之其秀在骨其雋在神才氣辟易萬人而絕無矜才使氣之習此二公所同也若以詩品論之閣下超詣軼塵逸情雲上如褐裘公子氣攝扶餘漉生則神味淵永吐屬風流如公瑾醇醪令人自醉一時瑜亮抗手騷壇而於炎荒瘴海之間得覩名賢何其幸歟不識閣下與漉生向有撫塵之雅否用敢一書介紹爲二君子聯文字之交弟質駑氣孱而齒已垂白矣恭維二君子離之爲滎陽之一鶚合之爲

平輿之二龍他日琢玉坊中刻蘇黃之小集陳芳園裏傳李杜之高名俾鯁生姓名得附高文以垂不朽此則區區之夙心儻亦二君子所樂爲表褻者耶

嶺西古稱蠻荒風景絕異李義山詩云虎當官道鬪猿上驛樓啼柳子厚詩云山腹雨晴添象迹潭心日暖長蛟涎皆在嶺西作也周昉叔都轉見示粵遊近稿辛未十月由隆安入果化云入峽天黏石緣江路斷泥星流蛇蠱出月暗虎偃啼箐鑿山魃屋簾懸峒

猿梯炎荒南去僻風景日悽迷丙子二月夜泊南鄉  
云舵樓晚飯古榕陰擁鼻篷窗效越吟月氣曉紅知  
晝熱江光夜碧覺春深烝溪霧毒蛇懸樹掠徑風香  
麝出林七載瘴鄉青鬢改浮家長繫故園心雨次上  
渠灘云江風捲地散蠅蟲濕翠堆篷曙不分遠峽猿  
聲青隔雨陰崖蛟氣白連雲一官憔悴投荒錄萬里  
悽涼誓墓文十口長饑行李乏愧他豪客夜知聞

有時

盜警皆善寫蠻荒風景者

粟香二筆卷六

江陰 金武祥 滄生

余金氏自明代遷江陰散處各鄉或數里或十餘里而近衡宇相望弦誦聲相聞科名仕宦亦相繼不絕以文學著者多有專集或藏于家或刊以行世庚申之亂蕩焉無存同治庚午以後余常家居搜輯先代之時藝於諸名公刊行選本及里塾鈔存讀本中得四十七首凡十二人各爲跋語如小傳仿俞氏百廿名

家之例而加詳之癸酉付梓顏曰江陰金氏文賸全  
椒薛慰農觀察序之謂制藝興而能文之彥恆鍾于  
一族以宜興儲氏金壇王氏桐城方氏爲況今備錄  
跋語於此

五世祖綱軒先生

諱映日  
字文煥

幼穎悟十餘齡卽倜儻有

志節爲文奇傑自喜洎爲諸生研究唐宋古文及制  
藝名大家爲深潛之學遂以時文名江左儲六雅先  
生數稱誦焉年益老文益工居鄉生事粗足無求於

外讀書談道不輟遠近來學羔雁成羣時吾郡人文極盛爭推先生爲壇坫主每就先生所居老屋集名下士爲文會請評隲之龔太翁鴻漸程學博景傅文最爲先生所賞每課輒冠其曹然決其非場屋利器其後元魁鼎甲繼踵而起者二十餘人而龔程兩公果不第焉先生旣負重望常喜拔寒畯如程文恭公景伊及弟景傅以弱齡遭家難先生令其來學飲食教誨十餘年並以女許字文恭公盛德所傳尤推卓

識今得其少時獲雋兩藝法密理真已足垂範後學  
登諸簡首願子孫世寶之

國朝雍乾間當氣運極盛之會名公鉅儒應運而興

爲前古所罕見 高祖敬齋先生

諱鑑字志達

生當其時

乾隆丙辰以博學鴻詞徵辛酉復列經學於 朝

授國子監助教攝監丞滿漢司成皆倚重以先生精  
制舉業特設高几重席坐先生其上選校諸生課藝  
付之梓都下喧傳爲藝林佳話後所傳成均課士錄

猶沿其舊也戊辰會試四書文首題爲好人之所惡  
一節房考齊次風先生得先生卷擊節歎賞薦之主  
司時沈歸愚宗伯已定靖江鄭公忬卷第一置先生  
卷第二齊公力爭非元不可沈公恚遂被黜揭曉知  
爲先生皆大惋恨沈公亟詣先生謝蓋二公皆先生  
同徵友也此文爲紀文達公的選人房行書菁華中  
具載齊公原評先生志在上第博高堂歡四次 京  
察一等並辭外用顧十試春官僅舉丁巳甲戌兩科



明通榜旋遷刑部主事以告養歸所著有丹鉛雜錄  
述聞錄諸書所作時藝凡二百餘首有金志達制藝  
刊板行世庚申之亂燬於火歲壬申嚴君於長沙  
獲購紀文達公所選房行書菁華中刻先生文七篇  
又於張月槎主政所選暨陽文鈔中得一篇益以家  
塾鈔存文六篇共十四篇後之學者藉以瞻先正典  
型亦可見斯文自有厯劫不磨者在聞之故老 五  
世祖綱軒公以耆儒宿學教授鄉里元魁鼎甲多出

其門先生受庭訓與諸名公角藝入夜或見有世所  
畫魁星者跳舞於庭光耀騰踔良久乃散嗚呼斯文  
精氣固如是哉

高祖敬齋公既以學行名當世其時與競爽者有

高叔祖蓉塘先生

諱銓字行達

先生幼從兄受業學成與

兄齊名爲文原本經術字字見根抵有時藻采煥發  
尤能以駢宕出之應京兆試中式第九人出爲丹陽  
教諭旋謝病歸平生操行嚴整與敬齋公優游林下

白頭昆季猶以品學相砥礪今於紀文達公所選房  
行書菁華中得文一首其裔或宦京華或客山左必  
有抱藏先集者當郵書採訪之敬齋公又有同祖弟  
時中先生諱起隆亦以名孝廉爲學博無後文亦無  
傳嗚呼是固有幸有不幸歟

吾鄉土地平曠水木清華生是邦者類多賦質和厚  
處境夷坦而嶽嵒厯落性褊僻而遇偃蹇者以武祥  
聞諸長老惟 曾伯祖南珍先生

諱孝因  
號溶川

爲最先先生

天資英敏讀書過目成誦詩文名重一時李申耆太  
史江干香草中稱其所著甚富嘗寄於其甥周綱堂  
爲人所攘所存僅蓼心拾餘一卷且且吟二卷太少  
爲慨慕而惋惜者甚至蓋先生有不可一世之慨以  
孤傲不諧於俗而屢困場屋復艱子嗣所至恆鬱鬱  
不自得嘗有句云今古無端供涕淚江山何處著狂  
徒可以想其概矣今蓼心拾餘及且且吟亦經亂散  
佚僅於他處得鈔本詩數十首又文一篇則院試見

賞學使之作嘗論古今之士豐於才而嗇於遇者若  
或有以致之先生之詩所謂未博後世名已取造物  
忌者固有慨乎其言之也嗚呼豈獨先生也哉

嘗考古著述家類皆以詩古文詞傳而時藝特其緒

餘也

曾祖玠堂先生

諱捧閭  
號靜然

生有異稟髫齡卽善

屬文鄉先達俱驚異年十七入邑庠旋冠歲試食廩  
餼文名藉甚然不以才地陵人後屢困鄉闈亦絕無  
憤懣意蓋自幼沈潛性理諸書晚年尤究心內典平

生勤於撰述視世所謂榮利泊如也乾隆戊申甥孫  
淵如觀察延之兗州官署著客窗偶筆用齊諧體以  
寓勸懲後數年作山右之行上太行登潞公臺所爲  
詩文益閎肆著客窗又筆凡忠孝節烈與夫畸人俠  
客之可傳而幾湮沒不傳者皆搜訪確實揣摩曲肖  
極盡其情而機局變化導源司馬子長而神明於柳  
柳州閱之入人心脾可歌可泣歐北先生謂非說部  
一流直可作古文讀所著又有韻字辨重十八卷守

一齋詩詞若干卷惟偶筆八卷久已鈔版行世庚申  
被燬今 嚴親復合又筆之僅存者刊於長沙守一  
齋詩詞亦將以次付梓嗚呼先生詩古文詞雖經亂  
多所散佚亦可以見一斑矣今於書麓中得時文十  
首在當日爲先生緒餘又爲棄去草稿然雅正清真  
一秉先民槩矧又何敢以緒餘而忽之哉

武祥既錄

祖父嘯厓先生

諱諤字一士

時文五首畢泣

然不知涕之何從也蓋距先生之歿已十有四年矣

憶垂髫時先生課之讀及弱冠以所著詩古文及時  
藝各若干卷付之將授之梓庚申燬於亂多方搜輯  
僅存詩稿二卷及己卯闈墨一首又制藝四首則晚  
年塾課所存而向時所擬付梓者蓋蕩焉無存矣謹  
按先生孝於親友於兄弟爲善不倦德容粹然所爲  
詩文皆和平渾厚如其人平生客淮徐及中州最久  
與諸名公設壇坫每一篇出爭相傳誦時文昌明博  
大風格原本天崇而負聲振采才力尤勝春闈屢薦



未售時論惜之嗟乎闡墨僅首藝耳而塾課文實武  
祥親捧几杖見其竄定以授及門者也將聲音笑貌  
口講指畫一展誦而如遇之顧念武祥學殖荒落不  
克仰承祖德以自振拔慚懼滋甚爰綴數語以誌哀  
慕云

族中與吾 祖一士公同時同輩而年齒較稚者爲

大坎支

叔祖仲章先生

諱相號  
華廷

先生操行質慤恂

恂然有儒者氣象平生不與外事惟研究舉業好扶

植後進負笈者踵門經先生指授爲文皆有法度入  
庠序有聲其門下士亂後猶有存者述先生遺訓每  
歛歔久之老輩風裁今猶想見也文二首取瑟一首  
則小試冠軍之作云

從伯枚偶先生弁山堂時文計百篇兄葆令旌德時  
刊行之未數年燬於兵燹文之傳否固有數存耶何  
梓未數年遽付浩劫也先生資性絕穎悟十齡卽善  
屬文尤好爲詩歌趙甌北觀察先生外王父也奇其

才妻以女孫而詩學遂得其指授嘉慶甲子應京兆  
試中式第六名闈藝膾炙人口傳誦一時久之選安  
徽廣文歷望江建德兩學擢知縣未及赴選而卒先  
生沈酣經史能括其精義而以真氣行之晚益肆力  
古文尤工駢體詩詞才望絕高而抑然常不自足人  
謂其有名士之實而不居名士之名信然其任建德  
廣文時子外舅黃公素庵適宰是邑見其培植士風  
修緝祀典而查卹水災惓惓焉尤盡心力武祥生也

晚亦獲接言論丰采而外舅數爲武祥言之是又非  
如名士之托空言而鮮實用者先生詩古文若干卷  
已蕩焉無存其有君子齋試帖猶存數十首賦二首  
刊律賦新編及澄江賦約中今制藝得四首則大小  
試獲雋之作也若前刊行百篇者蓋難以復獲云

嘗謂文章與政事殊科工於文章者未必優於政事  
近世以科目進者或拘迂泥古或選悞無能是文章  
政事之難兩全也 從伯子晉先生

諱安世  
號介軒 研精經

籍有聲庠序省試十次始舉於鄉先從余 祖父遊  
以品學同爲時所重暨出宰江右每令一邑豪猾肅  
然盜賊斂跡而勤求民隱有古循吏風武祥客江右  
歷遊會昌石城浮梁各邑皆先生舊治也都人士猶  
稱頌弗衰蓋非僅以文章名世者雖一令未竟其才  
而兄國琛勛猷卓著克遂顯揚然後知績學砥行未  
盡報於其身要必於其子孫矣先生應試久又常授  
徒所作時藝最夥經亂悉燬今得壬辰闈藝一首於

章君樸齋所選澄江大小題文中得一首於張君月  
槎所選暨陽文鈔中得一首又於友人讀本中得二  
首函錄登之亦以見政事文章固有兩全者在矣

我金氏散處江陰西陲多自馬口分徙其世居馬口  
者雖無魏科顯仕而橫經鬻舍之秀繼踵不絕若審

緘兄

諱之銘更  
名希曾

則余幼時猶及見者兄少孤能自刻

厲弱冠游邑庠與郡士角藝輒冠其曹經史寓目卽  
識大意兼習天文地理之學尤長幹濟地方公事皆

賴其區畫而屢困省試未展其才今得兄小試獲雋首藝其先十數公號能文者皆無可搜輯惜哉

余搜輯先代時藝踰一年將付之梓從姪城自長沙

郵寄其嗣父硯孫兄

諱葆號竹友

乙未聞墨首藝請彙入

之謹按兄少年英敏伯枚偶公方以才名重一時兄承庭訓復能自砥厲以故學益純篤及仕皖以幹濟稱值多事之秋屢任艱鉅積勞成疾遂乞假歸庚申之亂金陵潰圍所在鼎沸余與兄遷避不常南北異

路壬戌夏兄適楚余亦適江右各附夷艘越賊巢西  
上遂晤於金焦之麓雖驚悸畧定而罹亂之苦行路  
之艱握別中途淒愴極甲子江南平而兄先卒於  
襄陽旅次已不及見矣嗚呼患難死生之際尙忍言  
哉

吾宗入 國朝掇科者自歸州知州訥庵公諱秉哲  
康熙丁卯科掄魁始其嗣漸式微閱六傳而裔孫昉  
入邑庠始以文行著卽曉初姪也以世次計余長於



曉初以年齒計曉初長於余曉初嘗教授里塾距余居二三里時相過從性喜飲飲少輒醉好諧謔跌宕不羈爲文振筆疾書一掃拘滯庸腐之習庚申避亂遠出客死中州使天假之年所造固未可量今搜輯先代遺文適得其受知學使次藝因附存之嗟乎疇昔文字之樂彈指已十餘年人往風微滄桑倏易閱斯文益不禁感慨係之矣

吾家入 國朝以來六世祖宣揚公諱猶龍有聲庠

序以孝行受 旌縣志有傳嗣是五世祖綱軒公高  
祖敬齋公會祖玠堂公祖父一士公皆載縣志文苑  
傳故邑侯家鷺青太守序文牘篇首云士先德行而  
後文藝其德足以裕後者積之厚流之光其文章亦  
足傳爲家學而精神法脈常綿綿延於數十百年  
間蓋知之深矣

吳中人鮮有以武功著者咸同間粵捻各匪之亂吾  
鄉從戎者實繁有徒而能摧巨寇定大計關東南全

局爲諸將帥所推服者要當以逸亭兄稱首兄先以諸生佐羅忠節公澤南於湘軍嗣是李忠武公續賓勇毅公續宜皆倚如左右手維時湘軍名聞天下兄或分統或獨將所向有功歿後余爲撰事畧記其大概於此兄諱國琛號葆士

咸豐九年李勇毅公假歸湘鄉適石逆達開攻湖南之寶慶府城號稱百萬援軍雲集百數十營星羅棋布與賊壘環峙相持不下胡文忠檄調赴援兄率湘

軍星夜馳抵寶慶遇賊奮擊洎李勇毅公自湘鄉至而部署已定遂得破竹之勢七月十二日大破石達開於賀家坳斬僞元帥胡德孝等悍賊數百名合諸軍追賊至粵西界阿婆山幾獲石逆十二月陳逆玉成以全股悍黨及捻匪十餘萬眾上竄圖解太湖之圍進圍鮑軍門超於小池驛諸軍先後往救皆失利皖鄂震動東征大局攸關胡文忠憂之兄素於皖北險要地勢訪察詳明繪圖註說進呈於胡文忠請出

賊不意由間道急行赴援

胡文忠致書糧臺謂得兵心明地勢六字之考可質

天地鬼神而無疑實本於此

文忠大喜時歲暮大雪

役文忠傳中畧之體裁如此  
兄激厲將士冒雪由高橫嶺仰天庵直出賊背十年

正月十一日黎明賊望見山頂旗幟大驚氣奪兄乘

勢縱兵疾擊一日夜破賊壘七十餘座生擒悍酋藍

承宣等四百餘名會同各軍四面兜剿斃賊二萬餘

名立克太湖縣城潛山縣之賊亦相繼潰敗陳逆遁

走我軍東征攻皖之局始定十一年二月逆匪大股

數十萬由皖北上犯楚疆連陷黃州孝感雲夢德安  
隨州諸處李勇毅自桐城青草塢拔隊援剿而賊已  
繞竄腹地在諸軍之前兄建議官軍若自下追剿賊  
必直趨武漢省垣將危請以大軍渡江由南岸疾趨  
上游先固根本爲迎頭截擊之舉因以水師砲船載  
勇南渡一日夜馳抵武昌兄分統七千餘人復渡北  
岸擊賊於楊店一帶立復孝感縣城賊鋒大挫連克  
雲夢縣進攻德安府悍逆馬融和率匪黨數萬負嵎

死鬪苦戰百餘日卒以長圍克之九月赴襄陽道任  
以樊城爲財賦之區商賈輻輳兄督弁勇建立土城  
不煩民力屹然成重鎮同治元年兩奉 特旨赴陝  
整頓營伍以保關陝重地皆以楚省 奏留不果行  
七月逆匪圍攻河南之南陽府勢甚岌岌兄念南陽  
與襄樊接壤唇亡則齒寒遂率師越境往援大破逆  
匪立解城圍官民莫不感泣蓋以豫援不至危亡已  
在旦夕也

近年宦粵東者多刻有家集見貽其最著者姚彥侍  
方伯有其祖文僖公邃雅堂集又咫進齋叢書二集  
計三十餘種龔謫人方伯有高祖海峯先生澹靜齋  
集沈廉仲有其父鼎甫侍郎遺稿林訪西有其祖文  
忠公政書鄒和之有其父壯節公集及道齊正軌福  
錫亭有其父倭文端公遺書許子雙有其父周生先  
生鑒止水齋集錢芷舟有其父新梧先生衍石齋集  
皆足以規世澤也



澹靜齋集凡文鈔八卷詩鈔六卷祭儀考四卷說禠  
二卷邶風說二卷離騷箋二卷積石齋四書文三編  
閩縣龔海峯先生著先生諱景翰仕至甘肅蘭州守  
嘗受業朱梅崖太史爲文法律謹嚴深於經學尤優  
於政事堅壁清野議則奉 詔頒行尤可垂法後世  
同治間以先生四世循吏政績 詔付史館立傳山  
東巡撫奏請所謂家承清白世著循良洵足爲史策  
光也

澹靜齋詩集平涼新樂府四章亦次山春陵行之亞  
篇長不備錄彭澤懷陶靖節云先生亦作合於世豈  
忘情偶以督郵去遂傳處士名雲霄孤鶴唳風雨一  
雞鳴想見東籬下滄桑感未平此意未經人道

許周生駕部云兩漢功曹掾吏皆擇邑之高望者補  
之六朝時令史尤重至明而吏始與士分途天下有  
以操守稱官者未聞以操守稱吏也無高名之可慕  
無厚祿之可耽則彼所夙夜用心以治事者安得不

惟利是圖乎今欲吏不爲奸則莫若高其品使士人爲之士人爲吏習知政務無迂懦不曉事之患其於治道必有所裨

衍石齋集惟記事藁續藁各十卷詩藁六卷相傳先生仿明焦竑獻徵錄爲國朝徵獻錄凡八百餘人積二三百卷又傳先生於徵獻錄之外復節錄名臣爲先正事畧蓋卷帙繁而未刻也平江李次青方伯元度著先正事畧六十卷名同而先付梓已風行海

丙云

近年粵東大吏講求吏治尤尙風雅余去歲奉總制檄赴粵西往返三閱月凡土俗邊情山水人物皆錄存雜記而詩中亦臚陳之以備採風姚彥侍方伯題粵西游草云信有江山助清吟迴不羣宏深郟詵策幽峭柳州文人物蘭陵盛才名金粟聞鄒陽好伴侶壇坫張吾軍龔藹人廉訪題云桂林山水天下奇卧游時復生遐思讀君歌詩出金石近時邊徼多旌旗

選勝好尋籌筆驛探奇已到道鄉祠豈徒邱壑留題  
詠我亦南交欲問師周昉叔都轉題云羣從兼文武  
門材總軼倫大名高一代餘技了千人書劍從軍舊  
江山厯宦新看題一品集莫自惜風塵張丹叔觀察  
題云水自靈渠發山從陽朔奇讀君新詠本憶我舊  
游時灘急舟行速峯高日上遲別來今十稔慙愧鬢  
成絲不辭千里遠邊事問炎方異境筆能狀奇才斗  
莫量風流追畫壁雲氣壓歸裝豈作滄桑感匡時策

自長備錄之以誌羣公之雅

繆文貞公昌期從野堂存稿八卷得之雙門底書肆  
已蟲蝕其半矣朱竹垞云六君子之獄多以攻客魏  
取禍文貞無言責而黨奄人者尤惡之以善謀見嫉  
也追贈誥命有云及憲臣請劔之疏發而詞臣屬草  
之怨深始猶鉗銅於黨碑旋復張羅於詔獄云云卽  
實指其事稿中示子云第一做好人第二勤讀書凡  
事從天理起見又云生當季世種禍容易種福極難

又云瘠鹵之地難於發生及既生之後灌溉培植遂成良田吾子弟培之植之自今日滅之裂之亦自今日不滅顏氏家訓也在獄後有自敘末云余行真而未篤口直而多躁心慈而色厲爲文有筆而無學爲學有志而無養而不敢營私背君欺心賣友一念亦天地神明所共鑒也禍至于此豈非往因聞報之後了無怖戀云云亦可見其從容就義矣

詞林海錯類選四卷江陰夏茂卿先生樹芳原輯長

白禹門學使福申取而增訂之道光時學使視學江  
右囑同安陳君筠竹榮春於庚寅年校刊之按類編  
排自天文至昆蟲分四十六門備詞藻之用以新穎  
爲宗惟僅有四卷未能博瞻云

二卷錄王澤山花品四十八首近閱絲州孫桐生小  
峯光緒五年在長沙所刊 國朝全蜀詩鈔載澤山  
名再咸溫江人道光己酉拔貢咸豐壬子舉人稱其  
才鋒雋出幼時有神童之目鄉舉後計偕入都留京



邸幾三十年所爲詩橫恣超逸尤工樂府酒邊花下  
落筆千言其遊戲諸作尤膾炙人口晚歲益佗僚無  
聊歿後全稿散佚就萬縣左逸仙大令所鈔數十首  
著錄之

澤山有水利疏云田中中田下下田至上上田無價  
冀州況稱膏腴野欲治田先治水治水又從治河起  
河治眾水有所入茫茫百萬涸田出京師熟天下足  
三吳之民可永復瀟瀟暮雨江南曲東至鎮北至檀

南至鉅野西至邯鄲燕非昔燕田昔田昔以敵契丹  
昔以制柔然昔稱伯國誇強藩榆關租千石易京粟  
十年何嘗取給東吳船大農正分農司伯生謀議伯  
顏施龍門堰鴻隙陂誰其立者兩黃鵠何以鎮之三  
石犀况復神皋奧區天所定子孫萬萬億載明堂基  
食報詎可論歲時河清有頌此有表臣請更上禹貢  
考

陽湖莊衛生方伯受祺由浙藩引退僑寓益陽樂宗

禪靜旋游楚北歿於舟中何子貞太史挽聯云勇退  
急流神鸞戢羽覺餘大夢孤鶴橫江余代逸亭兄挽  
以額云爲逍遙遊切其姓亦切其人有楓南山館遺  
集八卷集中詩惟游絲和韻四首其一云曾共游絲  
到洛陽飄飄素質謝華堂前身已隔重霄近遺恨還  
添一縷長莫繫春駒過短堞且隨晨燕度橫塘祇今  
得遂棲遲願不逐鞭絲道左揚皆托興之詞也

袁厚安觀察績懋寄籍順天以第二人及第後觀察

閩中殉節有味梅軒遺稿四卷黃河舟中紀事有云  
轉舵象鼻長編篷鼉蓋覆竹纜牽修蚶蒲帆張巨鬣  
船唇挺短杙艫尾排亂樹小大甕牖開上下短梯湊  
艙低智井深板堅牛革厚重如車薄笨傲如屋荒陋  
擠如蜂窠密雜如蟻穴糝進如伏莽蛇出如升木狹  
坐如豚圈蹄行如鶯縮脰書生居鶯籠孟祖入狗竇  
伏處懣欲絕計程苦難驟刻劃頗似韓孟其他五言  
如俗吏事催科詩酒皆成仇但能捐頂踵即可扶綱

常山寺幽且深，叩門鶴先應。一徑入山麓，萬綠生野陰。一塔出烟中，倒影碧池臥。怪雲蒸海氣，落日蕩江湖。七言如脚根，日月轉金輪。袖底星辰灑，珠彈世間萬事無。一可欲恃聰明計，已左名不求知方。是隱貧原非病，卻難醫。帆破已成蝴蝶影，櫓柔時作鷓鴣聲。皆佳句也。

厚安觀察尊人素珊先生與余從伯枚偶先生最相契。觀察詩有父執欽耆碩之句，註云枚偶與先君子。

訂交三十年味梅齋稿中並錄丙申河朔書院與金

丈枚偶明府鼻馮芝馨編修琛屠可漁茂才有綸消

夏聯句詩云訪舊來河朔枚偶堂開北海樽文章推

老輩可漁氣誼合諸昆正值炎歛節厚安依然烟雨

村清談蓮擁幕芝馨列坐柳爲藩玉椀盛冰水枚金

波瀉月痕風驅熱境轉漁酒送冷香吞花影添籬角

厚蟲聲出樹根嫩涼醒薄醉芝逸興霑高竈入耳漁

舟唱枚驚心雷鼓喧松棚高百尺漁芸帙誦千番夢

悟游仙枕厚吟成避暑軒簾紋垂畫檻芝琴曲度雲

門綠篆蕉心字枚青裁犢鼻禪焚香金鴨煖漁啜茗

石泉温瓜戰分紅玉厚榴飛護絳旛燭光搖綺席芝

星采麗丹閣欲步長堤去枚遙看古刹存酒後同至古槐市

老僧迎客到漁孤樹倚天尊直立霜皮峭厚全清霧

眼昏百圍生遠籟芝一氣拱虛垣山勢連王屋枚河

聲逼沁園蒼茫尋舊躡漁迤邐走平原竹箭洪流疾

厚桃花濁浪渾穆陵關外路芝星海域西源習習輕

颺起

枚

翩翩細葛翻漏殘人已倦

漁

歸晚鶴猶蹲

學逃禪靜

厚

聊聽說鬼煩游思懷竹素

芝

結契美蘭

言白髮爭駒隙

枚

青燈蝕蝨魂傳經幾家業

漁

承露

九霄恩聚散渾無定

厚

升沈且莫論重教發醅飲

芝  
有榻下陳蕃

枚

趙甌北觀察詩云幾被老天吞濃雲裏一村蔥雷聲  
在甕急雨勢翻盆啼怖兒收淚奔追客斷魂忽然風  
一掃夕照又當門袁厚安觀察詩云雨聲如突騎凌



厲勢無前鯨跋三山浪龍耕百道烟癡雲團濕絮密  
樹挂流泉風定晴光轉依稀噪晚蟬余舊有詩云疑  
捲江河水憑空倒瀉奇波濤千樹亞風雨一亭危佳  
節黃梅過新涼翠簟知喧豷聲不斷遙識漲灘時皆  
摹寫夏雨實有是景

厚安句云刷岸如聞風雨來衝波更比雷霆疾此黃  
河之冰也余有句云千層細碎分瓊瑤一路琤琮奏  
琴瑟此江南之冰也

廣州皇華館戲臺聯云回首玉堂聞樂未忘天上曲  
賞音珠海採風兼及越南謳杭州會館戲臺聯云一  
闋荔支香聽玉笛吹來遍傳南海雙聲楊柳曲問金  
樽把處憶否西湖江蘇會館戲臺聯云臺榭拱佗城  
問何人鐵板銅琶唱大江東去冠裳集吳會看此際  
朱輪華蓋踰五嶺南來

北江詩話云虎邱泛舟以朱翠炫目勝秦淮泛舟以  
絲竹沸耳勝平山堂泛舟以園林池館稱心勝若西

子湖鑒湖則以上三者春秋佳日時時有之又加以  
山水清華洞壑奇妙風雲變化烟雨迷離覺可以娛  
心志悅耳目者無逾于此外如鴛鴦湖之百重楊柳  
消夏灣之十里芙蓉柳色花光又其次也

余謂珠江泛舟以燈月交輝勝蓋珠江江面極寬凡  
橫樓紫洞艇排列水面有上中下三塘之分當夫華  
筵夕張明燈萬盞纖雲四捲潮平不波皓月當空照  
耀如畫所謂炫目沸耳者亦以此時爲最勝云

招銘山孝廉子庸製粵謳百餘闕俗名解心多以粵  
中方言串入此書初出紙貴一時或謂其無語不香  
有愁必媚至今歌樓燈舫猶盛傳之有石道人序云  
戊子之秋八月旣望蟋蟀在戶涼風振幃明珊居士  
惠然詣我悄然不樂曰此秋聲也增人忉怛請爲吾  
子解之余曰唯唯居士曰子不攬夫珠江乎素馨爲  
田紫檀作屋香海十里珠戶千家每當白日西逝紅  
燈夕張衣聲絳繚雜以珮環花氣氤氳蕩爲烟霧穠

纖異致儀態萬方珠女珠兒雅善趙瑟酒酣耳熱遂  
變秦聲於子樂乎余曰豪則豪矣非余所願聞也居  
士曰龍戶潮落鼉更夜午游舫漸疎涼月已靜於是  
雛鬢雪藕纖手分橙蕩滌滯懷發杼妍唱吳歛甫奏  
明燈轉華楚竹乍吹人聲忽定於子樂乎余曰麗則  
麗矣非余所心許也居士曰三星在天萬籟如水華  
妝已解薤澤微聞撫冉冉之流年惜厭厭之長夜事  
往追昔情來感今乃復舒彼南音寫伊孤緒引吭按

節欲往仍回幽咽含怨將斷復續時則海月欲墮江  
雲不流輒喚奈何誰能遣此余曰南謳感人聲則然  
矣詞可得而徵乎居士乃出所錄曼聲長哦其音悲  
以柔其詞婉而摯此繁欽所謂悽入肝脾哀感頑豔  
者不待河滿一聲固已青衫盡濕矣

廣東俗語云到廣不到潮枉向廣東走一遭到潮不  
到橋枉向潮州走一遭蓋以潮州繁盛亞於廣州湘  
子橋下之六篷船比於珠江之紫洞橫樓也余兩至

潮州見其民殷物阜洵稱富庶湘子橋在東門外橋寬而長東西石墩二十三兩旁店舖比櫛中段以紅船十八爲浮橋所謂六篷船者往來官商皆乘之如錢塘江中之江山船卽九姓漁船舍此無他船可乘也然六篷船則樸質不華首尾直通無前後內外艙之別徵歌載酒無自問津湘子橋頭惟有烟水蒼茫青山相向而已此則昔盛而今衰非所見之遜於所聞也

潮州西郭外有西湖湖水澄澈林木蕭森而石壁瑰  
奇且有巖洞如堂室者有老君巖天然洞四望臺乘  
風待月亭諸勝余有句云巖深古佛闢成屋樹密幽  
禽巢作家亦見幽邃之致然杭潁雌雄究未敢相與  
較也

韓山韓江皆以昌黎得名文公廟在韓江之東韓山  
之頂丁丑年余入廟瞻謁見舊刊公所書白鸚鵡賦  
及東坡所撰廟碑曾有詩云秦嶺藍關外炎荒萬里



投公神在天下廟食此潮州蛟鱷文能約江山姓尙  
留至今稱易治師法重千秋

文公祠有聯云天意啓斯文不是一封書安得先生  
到此人心歸正道只須八箇月至今百世師之旁有  
韓山書院聯云奉以爲師學有經術通知時事號稱  
易治篤於文行延及齊民

湘子橋以文公姪得名附會神仙習俗可哂橋之半  
有湘子廟旁有鐵牛則鑄以鎮水者舊有一二已逸其

一橋跨韓江發源汀水卽鄞江流行七百里入海春夏水漲勢甚浩瀚橋每患衝圯云

城北有金山新創書院亭榭齋室煥然一新升堂而望則山川城郭歷歷在目張丹叔都轉詩云一水南趨歸海疾三山東峙抱城回可得其大概矣

鹺政故實極少昔年潮州喬豹園同轉請代撰其署丙楹聯余率成一聯應之云憲使許分猷會典居府廳州縣而上鄰疆歸統轄職掌在潮嘉汀贛之間蓋

廣東運同引地跨三省四府州各州縣銷鹽處分應  
運同開造也豹園名文蔚山東進士由順天治中推  
升運同與硯生兄爲乙未同歲生旋卒於潮州云

德慶州悅城龍母廟規制宏敞靈蹟昭著廟左有墓  
卽五龍壅沙而成者也相傳母生於楚懷王辛未之  
五月八日是日神誕香火尤盛南越志載母姓溫氏  
肇慶府舊志則爲蒲氏居悅城之南常捕魚得卵大  
如斗養之出五物如守宮能取魚薦母母偶治魚揮

刀誤斷其尾而去數年乃還見其輝色炳耀謂曰龍子復來耶親馴如初秦始皇聞之曰此龍子也朕德之所致乃使以元珪之禮聘媪至始興江去端溪千餘里龍輒引舟還不踰夕至本所如此數四使者懼而止母死鄉人葬之程浦水口一夕風雨雷電大作有五龍移於北岸壅沙成墓因立孝通廟祀之宋元豐賜勅曰永濟夫人明洪武詔稱程溪龍母余泊舟悅城曾入廟瞻謁見楹額多淺俗語因擬一聯云異

蹟溯周秦一少崇封神在孝靈威遍江海千秋永濟  
母能慈

錦石山一名華表石在德慶州江岸當西甯羅旁水  
口上有石柱高插雲表明總督凌雲翼刊華表石三  
字於上廣東新語云西江自崧臺而西舟行三日夾  
岸皆土山繇亘惟此石拔起若蓮莖上矗旁無附麗  
漢大夫陸賈使南越從桂嶺取道于此嘗禱山靈若  
佗肯降當以錦爲報其後佗去帝號受南越王封與

賈泛舟珠江溯牂牁而上賈因以錦包山後錦不足  
植花卉代之遍巖谷間望若霞綉因名錦石山至今  
異花甚眾終歲如春舊有陸大中祠今毀賈功名以  
南越始終其魂魄當不忘此宜建祠以報賈安南越  
之功亦炎方之盛事也云云余過此有詩云華表江  
頭石誰尋陸賈祠歸裝猶想像報錦尙傳疑霸氣降  
炎徼高風憶往時磨厓應補泐漢使紀功碑蓋以錦  
包山似涉附會惟負然峭壁泐碑最宜應與建祠並

重較勝於凌制府之刻華表石三字也

三羅在勝朝爲獠獠窟穴之所萬厯四年總督凌雲翼會師二十萬分十路征之剿平至千餘里以瀧水縣爲羅定直隸州邑其東境曰東安邑其西境曰西甯今則斑斕推跣成化衣冠黝溪復巖胥安耕鑿矣余至羅西詩云此是獠獠窟羅旁昔蔓延驚瀧咽銅鼓毒霧響藤弦埽蕩一千里涵濡三百年居然風俗化耕鑿樂堯天今鄉間時有於土中耕出銅鼓者

陳采珊大令曾得之

六月朔日泊舟肇慶觸熱征途連日困鬱乃登岸游  
寶月臺在北郭外里許額曰星巖書院堂祀包孝肅  
後卽寶月臺也北瞰瀝湖遙睇星巖實擅端州之勝  
最後至汎瑟軒憑欄縱觀芙蕖萬頃澄波如鏡足滌  
塵襟清風送香頓忘炎暑矣張午橋太守聯云兀兀  
醉翁情欲借斗杓同酌酒田田詞客句閑傾荷露試  
烹茶李恢垣吏部聯云七石碧巉巉終古星芒垂北



戶一輪光皎皎此間月色滿西江均稱雅切

由寶月臺北望星巖照水玲瓏有一湖之隔沿隄曲折將五里而遙夾道水松每橫短狃半塘菱葉宜泛小舟先至玉屏風巖爲七星之一與聞風巖相連並峙者也小憩碧霞元君祠左上至三仙閣中途經扶蘇臺度夾壁名小千尺嶮危厓忽開中裂一線巨石欲墮上壓萬鈞更上至玉皇殿曲徑螺轉時尋古碑深樹鳥呼偶見異卉逕造絕頂已愜遊情復下山游

石室巖卽今所謂大巖者水月宮及蓮花洞在焉尤  
七星之勝境也水月宮則銅佛莊嚴古殿宏敞金身  
不壞鐵木猶存旋至蓮花洞先在洞左讀李北海端  
州石室記摩厓旱畢辨訛椎榻漸損洞門砢然仰視  
僅離數尺少進則穹窿數十丈悟象似碗倒懸如鐘  
乳結萬狀巧奪造化泉竇四溢冷侵肌膚中有石徑  
繚以迴欄循欄左行境益幽窅再轉則別有後洞洞  
口綠陰護之拾級而上爲璇璣臺供觀世音就巖爲

龕築石成像踞蒲團小憩覺世界清涼不知炎暑之  
正中也日影漸移餘勇猶賈復上盤磴五百級滑不  
容趾援鐵絙以登闕其無人是玉虛之殿將躋崧臺  
訪上帝觴百神之所而雲陰漸起雷聲遠聞遽循歸  
途遂放征棹江風山雨猶送之於羚羊峽口云

是晚過羚羊峽泊羅隱涌越日游鼎湖山蓋離涌十  
里耳清晨坐竹兜行稻畦間遙見七星蒼蒼猶可指  
數入兩山間則石徑縈紆夾道泉聲有迎客意盤曲

而上林木蕭森有翼然出於樹杪者半山亭也額曰  
小歇因坐石而啜茗焉經十餘轉始達慶雲寺殿宇  
崇宏戒律嚴整僧眾凡二百餘人遍游各堂廡愛其  
山廚以規通泉取不盡而用不竭旋爲設齋蔬肴六  
簋米白而茶甘僕從則脫粟兩肴而已亟至飛水潭  
瀑布千尋由高嶺而出噴玉跳珠翻濤滾雪不足喻  
其奇也此泉發源白雲山其頂有湖迤邐而來將及  
十里至此一落如白龍從天而下遂成奇觀惜建亭

處少遠樹復蔽之必近瀑再建小亭終日坐臥其中  
乃足以快心目隨園鼎湖詩云瀑聲漸大人聲亦余  
得句云瀑聲愈喧山愈靜均非身歷者不知旋下至  
半山亭徘徊久之乃返考是山名鼎湖以中峯圓秀  
左右諸峯三歧別出望若鼎峙故名或曰絕頂有湖  
鼎應作頂唐時有白雲寺至明啟禎間僧人棲壑移  
創此寺始爲名利焉

鼎湖之名著於明季鼎湖山志云道書洞天二十有

四福地三十有六鼎湖皆不與焉然一統志則云道書以爲第十七福地豈別有所考歟

星巖有七曰石室巖曰屏風巖曰聞風巖曰天柱巖曰蟾蜍巖曰仙掌巖曰阿坡巖黎二樵銘云南服隕石北斗降精日入壁曜霞標赤城人寒無語山秋有聲雲厓爭力已割未傾地深天高心奇語平闔騎五羊斟酌七星